



(Favor ignora versaun ida antes no konsidera mak versaun ida ne'e)

Komunikadu Imprensa
30 Novembru 2017

**Aplikasaun pena multa ba kazu ho natureza violénsia doméstika presiza haree ba rekizitus
iha artigu 38 husi Lei Kontra Violénsia Doméstika**

Aplikasaun pena multa ba kazu ho natureza violénsia doméstika presiza konsidera rekizitus sira ne'ebé estabelese iha artigu 38 husi Lei Kontra Violénsia Doméstika (LKVD) nu'udar provizaun ne'ebé espesífiku liu relasiona ho krime violénsia doméstika.

“Tribunál tenke asegura katak desizaun sira iha kazu violénsia doméstika kumpri ho artigu sira iha Lei Kontra Violénsia Doméstika no orientadu ba prevensaun violénsia doméstika iha futuro,” dehan Diretór Ezekutivu JSMP, Luis de Oliveira Sampaio.

Iha kazu balun, Tribunál iha opsaun atu aplika pena multa nu'udar pena prinsipál tuir artigu 75 Kódigu Penál. Maibé iha kazu sira ne'ebé envolve violénsia doméstika, aplikasaun pena multa tenke konsidera rekizitus tuir artigu 38 hosi LKVD.

Ida-ne'e importante atu asegura katak Tribunál kumpri provizaun sira iha lei aplikável no asegura katak desizaun tribunál nian iha kbi'it atu prevene krime seluk iha futuro no asegura bein-estar iha sociedade.

Artigu 38 LKVD kona-ba hili no halo determinasaun ba pena define katak:

(1) Tribunal bele troka pena prizaun ba pena selu multa bainhira tuir presupostu sira hotu ne'ebe hakerek iha artigu 67 husi Kódigu Penál :

- bainhira garantia kona-ba seguransa ba vítima,
- bainhira agresór hatán hodi tuir tratamentu ka akompañamentu husi servisu apoiu ba vítima, no
- bainhira ne'e hanesan vantajen hodi mantein unidade familiar.

(2) Arguidu bele mós hetan kondensasaun ba pena asesoria hanesan bandu atu kontaktu ho vitima ho período masimu tinan tolu, bainhira konsidera katak pena prinsipál la to'o hodi prevene katak aktu hanesan bele akontese.

JSMP observa katak iha kazu violénsia doméstika sira ne'ebé Tribunál sira aplika pena multa, Tribunál la halo tuir rekizitus ne'ebé define iha artigu 38 LKVD. Iha kontestu atuál, Timor-Leste seidak iha kondisaun sira atu orienta arguidu “tuir tratamentu ka akompañamentu hosi servisu apoiu ba vítima”. JSMP fiar katak durante ne'e Tribunál sira falla atu identifika kondisaun sira

ne'e antes decide hodi aplika pena multa ba arguidu sira iha kazu violénsia doméstika. Tanba ne'e pena multa sira ne'ebé durante ne'e Tribunál aplika ba arguidu iha kazu violénsia doméstika la implementa Artigu 38 husi LKVD tanba la halo tuir rekizitus sira ne'ebé lei haruka.

LKVD subliña importânsia kona-ba protesau no seguransa ba vítima no sirkunstânsia relevante sira ba prevensaun. Tanba ne'e, Tribunál mós tenke avalia profundamente situaun psikolójia no sosiál vítima nian antes foti desizaun no aplika pena relevante sira atu aseguira pena/sentensa ne'e reflète nesiedade vítima nian.

Vítima tenke sente komfortável no seguru atu kontinua hela hamutuk ho arguidu/kondenadu no garantia katak arguidu (kondenadu) nia promesa ne'ebé nia deklarara iha tribunál katak sei la repete ninia hahalok no arguidu kumpre duni. Se tribunál konsidera katak pena multa mak preferavel liu, tribunál tenke kumpri kondisaun sira ne'ebé definidu iha artigu 38 LKVD.

JSMP subliña ona preokupasaun sira ne'e iha JSMP ninia relatóriu ho título “**Aplikasaun sentensa alternativa iha kazu violénsia doméstika iha Tribunál Distritál Oe-cusse-2015***” katak prosesu julgamentu no sentensa bele realiza ho objetivu oioin. Ne'e inklui: aseguira vítima nia seguransa; fó kastigu ba arguidu; dezamina arguidu husi hahalok hanesan iha futuru; dezamina comunidade iha-jerál husi hahalok krime; no fasilita rehabilitasaun no reintegrasaun ba arguidu iha comunidade.

Prinsípiu sentensa hirak ne'e presiza sai hanesan matadalan ba Tribunál wainhira sira foti desizaun, no tenke esplika ho klaru ba arguidu no vítima. Aleinde ne'e, Kódigu Penál define rekerementu espesífiku sira wainhira Tribunál atu hatún tipu sentensa oioin. Liuliu wainhira Tribunál decide atu substitui pena prizaun ho suspensaun ka pena multa iha kazu violénsia doméstika, importante atu haree ba prinsípiu sentensa, rekerementu espesífiku iha LKVD no sirkunstânsia úniku iha kada kazu.

Atu hetan informasaun klean, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl

*http://jsmp.tl/wp-content/uploads/2012/05/FINAL_JSMP_Sentensa-alternativa_TDO_Nov-20151.pdf